

SOALAN NO. 35

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : YANG BERHORMAT TUAN LIM GUAN ENG [
BAGAN]

TARIKH : 22 NOVEMBER 2016

SOALAN :

YB Tuan Lim Guan Eng [Bagan] minta **PERDANA MENTERI** menyatakan adakah pihak Kerajaan Persekutuan membantah persempadanan semula oleh SPR dan nyatakan semua surat-menjurat SPR serta sebabnya SPR gagal memenuhi semangat daripada Perlembagaan Malaysia yang sepatutnya menyamakan bilangan pengundi selari dengan prinsip Satu Orang, Satu Undi, Satu Nilai' sehingga kawasan negeri saya kawasan ADUN Air Putih dikurangkan lebih 1,000 pengundi. Juga nyatakan jumlah yang belum mendaftar.

JAWAPAN: YB DATO' SRI AZALINA BINTI OTHMAN SAID,
MENTERI DI JABATAN PERDANA MENTERI.

Tuan Yang di-Pertua,

Untuk makluman Ahli Yang berhormat, urusan Kajian Semula Persempadanan Bahagian-Bahagian Pilihan Raya dilaksanakan berlandaskan kepada prinsip-prinsip dan tatacara persempadanan yang ditetapkan di bawah Bahagian I dan II, Jadual Ketiga Belas, Perlembagaan Persekutuan serta di bawah Perkara 113, Perlembagaan Persekutuan. Prinsip-prinsip persempadanan yang dinyatakan dalam Seksyen 2, Bahagian I, Jadual Ketiga Belas, Perlembagaan Persekutuan adalah seperti berikut:

- (a) Kemudahan diadakan bagi pemilih-pemilih mengundi semasa pilihan raya dan bahagian pilihan raya tidak merentasi sempadan negeri;
- (b) Mengambil kira kemudahan pentadbiran yang boleh didapati dalam bahagian pilihan raya itu untuk mengadakan jentera yang perlu bagi pendaftaran dan pengundian;
- (c) Jumlah pemilih yang seimbang bagi setiap bahagian pilihan raya dalam sesuatu Negeri kecuali apabila terdapat kesukaran perhubungan dan pengangkutan yang dihadapi di luar bandar, luas bahagian pilihan raya patut diberi pertimbangan; dan

(d) Memelihara hubungan tempatan.

Sehubungan dengan itu, pengwujudan bahagian-bahagian pilihan raya adalah tidak bergantung sepenuhnya kepada jumlah pemilih, tetapi masalah dan kesukaran pemilih di kawasan luar bandar juga dititik beratkan dan diberi perhatian. Oleh yang demikian, pembahagian pemilih berdaftar yang sama rata bagi setiap bahagian-bahagian pilihan raya persekutuan dan negeri adalah sukar untuk dilaksanakan kerana terdapatnya kawasan-kawasan yang keadaan topografi dan demografinya yang sangat berbeza antara satu sama lain. Secara tidak langsung, wujudkekangan-kekangan dari segi lokasi yang terpencil, jarak antara lokasi-lokasi yang amat jauh serta jalan-jalan perhubungan, pengangkutan dan komunikasi yang terhad. Ini menyebabkan konsentrasi penduduk di sesetengah kawasan adalah jauh lebih tinggi berbanding penduduk di kawasan lain.

Secara lazimnya, kawasan luar bandar mempunyai bilangan penduduk yang sedikit dan meliputi kawasan yang sangat luas. Manakala, kawasan bandar mempunyai bilangan penduduk yang ramai dengan konsentrasi yang tinggi dan merangkumi kawasan yang kecil. Ini secara tidak langsung menyebabkan pembahagian jumlah bilangan pemilih berdaftar yang sama rata antara semua bahagian pilihan raya adalah sukar untuk dilaksanakan kerana ia akan menyebabkan bahagian pilihan raya di kawasan luar bandar akan merangkumi kawasan yang sangat luas. Ini sekaligus akan menyebabkan kesukaran kepada rakyat di kawasan tersebut untuk mendapatkan perkhidmatan daripada wakil rakyat mereka.

Perbezaan saiz kawasan dan pemilih di antara sesuatu bahagian pilihan raya adalah dibenarkan oleh undang-undang sepetimana diperuntukkan di bawah Seksyen 2(c), Bahagian I, Jadual Ketiga Belas, Perlembagaan Persekutuan mengenai penetapan dan prinsip-prinsip yang berhubungan dengan persempadanan bahagian-bahagian pilihan raya.

Untuk makluman Ahli Yang Berhormat, jumlah warganegara yang berumur 21 tahun dan ke atas yang layak mendaftar tetapi masih belum mendaftar sebagai pemilih sehingga Daftar Pemilih Suku Tahun Kedua Tahun 2016 (ST 2/2016) adalah sebanyak 4,373,708 orang.

Sekian, terima kasih.